

Asisko gutuna

2009ko iraila. 3. printzipioa: Eguneroko bizitza:

kanporantz, elkartasuna

11. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Hil honetan Asis Sarean denbora ematen diogun hirugarren printzipioak, edozein pertsonaren bizitzan oinarritzko jarrera den elkartasunari begira jartzen gaitu. Besteei, gertuko eta urrutikoei, emana bizitzeko prest egoteak (haiei ezezagun gisa edo modu interesatuan ez begiratu) gizaki guztiak elkartzen

ditu, sinestunak izan ala ez, erlijio batekoak ala bestekoak, era batera nahiz bestera pentsatzen eta bizitza ikusten dutenak. Jarrera honetan bizitzeko konpromisoak elkartzen ditu Asis Sareko pertsonak, irekiak bizitzeko eta bizi-esperientzia ezberdineko pertsonen osaturiko Sare izateko duten desioan.

Gogoetarako gaia

Elkartasuna eguneroko bizitzan

Egunean egunekoak lan asko ematen digu. Gure eguneroko errealitateak kezka eta erantzukizun garrantzitsu eta presazkoen zama darama; hor daukagu geure familia, lana, zailtasunak, norberaren oinazeak, adiskideak, aisialdiak ... Denbora eta ahalegin gutxi eman diezaiekegu gainerakoei. Baina pixka bat geure ingurura begiraten badugu, ni "neure bolara" joatearen eta eszeptiko izatearen aurrez aurre, joan gaitzke elkartasunera hurbiltzen. Eguneroko bizitzan solidario izatea laburbil dezakegu hitzotan: harrera ona egin. Bihotz zabalez hartu geure ingurukoak. Abegi ona egin, bestearen sufrimenduari aurrez aurre begiratu eta adi egon. Oinazetik ez dagoela, inork ez duela sufritzen eta dena ondo doala dirudien mundu honetan, baina larriz, porrotez, bakardadez eta norabide faltaz beterik dagoen honetan, gupidaz begiratu eta ikusi min dagiten hainbat gauza. Sufrimenduaren, injustizia, ezina, gaixotasun edo heriotzaren aurrean, hortxe egon, ez bizkarra eman, sufritzen duenari

lagundu sufrimenduari norabidea ematen, ez ihes egin, minak eman diezagula min, harrera ona egin. Eguneroko bizitzan solidario izatea, sufrimenduari begiak eta belarriak jartzea da. Pobreziari eta injustiziarri aurpegia jartzea. Nolako injustizia ikaragarrian bizi garen ez ahaztea. Behartsuei, gaixoei, etorkinei bizkarra ez ematea beren egoerak, askotan irtenbiderik gabeak, molestatzen eta bortxatzen gaituenean, abegi ona egitea. Eszeptizismo eta gogogabetasunari aurre eginez, ez etsi, ez ahaztu, ez axolagabetu besteaz. Eguneroko bizitzan solidario izatea, ondo ez dagoena salatzea da, injustiziarri irabazten ez uztea, ez etsitzea. Jesusek Ebanjelioan gupidaren bidea, azkenekoarekiko elkartasuna, erakusten digu etengabe. Frantziskok Maisuaren pausoak jarraitu zituen bizitza osoan, bere burua txiki eginez eta denei harrera ona eskainiz. Ez dezagula ahaztu besteen sufrimendua. Lanaz beteriko egun honetan, bizi gaitzela bihotza harrera ona egitera irekita.

Ebanjelioko pasartea: Mt 14,13-21

Jendea herrietatik irtenik, oinez jarraitu zioten Jesusi. Txalupatik jaitsi zenean, jendetza handia ikusi zuen Jesusek eta, errukiturik, gaixoak sendatu zizkien. Ilunabarrean, ikasleek hurbildu eta esan zioten: –Toki hau oso urruti dago eta orduak aurrera doaz. Bidal ezazu, bada, jendea, auzoetara joan eta jatekoa eros dezan. Baina Jesusek erantzun zien: –Ez dute zertan joanik; eman zeuek jaten. Haiek, orduan: –Ez

daukagu hemen bost ogi eta bi arrain besterik. Eta Jesusek: –Ekarri hona. Jendeari zelaian esertzeko agindu ondoren, hartu zituen bost ogiak eta bi arrainak eta, begiak zerura jasorik, bedeinkazioa esan, ogiak zatitu eta ikasleei eman zizkien, eta ikasleek jendeari. Asetzeraino jan zuten denek, eta gelditutako hondarrez hamabi saski bete zituzten. Bost mila gizon inguru izan ziren jan zutenak, emakumeak eta haurrak aparte.

San Frantziskoren testua: Hiru lagunen legendatik

Lehendik ere potreen ongile bazen, ordutik aurrera sendoago erabaki zuen bere bihotz barruan, aurrerantzean ez ziola limosnarik ukatuko Jainkoaren izenean eskatzen zion inongo pobreri. Honela, bada, etxetik kanpo zegoela behartsuren batek limosna eskatzen zion bakoitzean, diruz laguntzen zion, abal bazuen. Dirurik ez zuenean, berriz, gerrikoa edo burukok txanoa ematen zion, pobrea esku-butsik ez bidaltzeko.

Frantzisko betitik izan zen emaile eta eskuzabala. Baina oraingo hau ez zen gauza bera. Gupidazko erraiak sortu zitzaizkion, nork jakin nondik, eta limosna bakoitzak bere txera guztia zeraman. Eskale bakoitzari hurbiltzen zitzaion, haien izenak ikasten zituen, beren bizitzako zerbait kontatu ziezaioela eskatzen zien, beren itxaropenengatik galdetzen, osasunagatik interesatzen. Haiak, handi eta txikien axola gabetasunera eginak, ez zuten konprenitzen nola merkatariaren semea haietako bakoitzaren existentzia kaxkarrak pertsonalki interesatzen zen. Eta gertuko sentitzen zuten. Haren begirada eta keinuetan ezkutuko txera, hitzez esan ezin halakoa, sumatzen zuten, aingeru bat Jainkoaren bihotza beraiei ekartzera jaitsi balitz bezala. (Ignazio Larrañagaren "El hermano de Asis" liburutik hartua).

15. Salmoa

Jauna, nor egon daiteke zure etxean?
Nor bizi zure mendi santuan?

Jokaera prestua duena, justiziaren arabera ari dena,
bihotz barrutik egia dioena;
mihi-luze ez dena,
lagun hurkoari kalterik egiten ez diona,
auzokoa iraintzen ez duena;

mespretxagarria bere aurretik bota
eta jainkozaleak ohoratzen dituen;
bere kaltetan izanik ere,
emandako hitzari eusten diona;
mailegu-dirua lukurreriaz ematen ez
eta errugabearen kaltetan eskupekorik hartzen ez
duena.
Horrela jokatzeko duenak ez du sekula koloka egingo.

Gutuneko azken hitzak

Elkartasunak egiazko ekintza behar du izan, ez besteen zoritxarraren bizkar norbere burua balioitsu eta inportante sentitzeko medio.

2009ko urriko eguneroko ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate urriko erreferentzia guztiak:

1 Lk 10,1-12	8 Lk 11,5-13	15 Lk 11,47-54	22 Lk 12,49-53	29 Lk 13,31-35
2 Lk 10,13-16	9 Lk 11,15-26	16 Lk 12,1-7	23 Lk 12,54-59	30 Lk 14,1-6
3 Lk 10,17-24	10 Lk 11,27-28:	17 Lk 12,8-12	24 Lk 13,1-9	31 Lk 14,1.7-11
4 Mk 10, 2-16	11 Mk 10, 17 - 30	18 Mk 10, 35-45	25 Mk 10, 46-52	
5 Lk 10,25-37	12 Lk 11,29-32	19 Lk 12,13-21	26 Lk 13,10-17	
6 Lk 10,38-42	13 Lk 11,37-41	20 Lk 12,35-38	27 Lk 13,18-21	
7 Lk 11,1-4	14 Lk 11,42-46	21 Lk 12,39-48	28 Lk 6,12-19	

Oharrak:

Asis Sarearen ezaugarri nagusia da irekia izan nahi duela eta bere asmoa biderkatzea. Irekitasun hau sarean parte hartzen dugun bakoitzari egitea dagokigu. Guztiok biderka dezakegu Asis Sarea, hileroko Gutun hau jasotzera edo hileroko azken ostegunetan 19.30ean, ohiko lekuetan, ospatzen dugun otoitzaldian parte hartzera nor gonbida dezakegun pentsatuz.

Asis Sareari buruzko informazioa hartu nahi izanez gero, edo gutun hau hileroko hartzeko izen emateko, deitu 646-214896 telefono zenbakira edo bidali mezua asissarea@arantzazu.org helbide elektronikora.

Asisko Gutunaz, bakarka nahiz taldean lan egiteko iradokizunak

Asisko gutuna

2009ko iraila.

3. printzipioa. Eguneroko bizitza:

kanporantz, elkartasuna

11. zenbakia

Hil honetako Asisko Gutunak, Asis Sarearen hirugarren printzipioa den solidaritateari begiratzera gonbidatzen gaitu. Hemen gauza ez da heroi izatea, egunerokoa bizi nahi izatea baizik: adiskideekin, bikotearekin, seme-alaba eta familiarekin, lagun eta auzokoekin... ditugun eguneroko harremanak. Baina baita urrunagoekin eta gure arreta eta harrera onaren premian direnekikoak ere. Axolazkoa da, hau eguneroko bizitzan nola bizi daitekeen ikusiz joatea. Horretara gonbidatzen dute hil honetako jarraibideek.

Eguneroko bizitzan solidario izan: harrera ona egin

Begira zeure inguruan, har ezazu une bat oinazea, sufrimendua eta injustizia... jasaten dutenen egoeraz jabetzeko. Zeintzuk jasaten dituzte? Non? Zein da egoera zehatza?. Jar iezazkiezu begiak eta belarriak eta aurpegia; ohiturak eraman gaitzake egoera horiek ikusi gabe bizitza igarotzera.

Saia zaitzez sufritzen dagoenaren tokian jartzen, utzi enpatiari zeure barne-barnetik sortzen.

Egoera hauen aurrean, nolako jarrera hartzen duzu? Errealista izanez, nor da zeure harrera onaren premian? Zer egin dezakezu? Pentsa zerbait zehatza, zein hondaralaren ekarpena egin dezakezun. Har erabakia eta jar praktikan.

“Kupitu egin zen Jesus haietaz...”

Jesusek gupidazko begirada du denentzat, eta horrek etengabe harrera ona eginez biziartzen du.

Oso erraz pentsatzen dugu, besteek (gobernuek, udalek, GKEek, aberatsek...) hartu behar dutela konpromisoa, gure munduan dauden sufrimendu-egoeren aurrean. Baina Jesusek dio: “eman iezazkiezue zuek jaten”, guri eskatzen digu besteek arduratzea. Nori eta nola eman behar diogu jaten?

Ikasleen aitzakiak ere, bost ogi eta bi arrain besterik ez izateak, ez dio balio Jesusi. Daukagun pixka (gure baliabide materialak, gure denbora, gure kualitate eta ahalmenak) besteentzat jartzen baldin badugu, ugaritu egiten da.

Jesus bera ematen zaigu horrela: erabat, aitzakiarik eta bainarik gabe.

“Frantziskori gupida sortzen zitzaion erraietatik...”

Jesusen jarraitzaile zintzo bat aurkitzen dugu Frantziskorengan. Aitzakiarik gabe, gogoeta eta hausnarketa teologiko handirik gabe, praktikara doa, Jesusek egiten zuena egitera. Horrela doa bihotzean gainezka duen eskuzabaltasuna premiadunei zabalduz.

Frantziskok, berrirori ere, geure buruari begira jartzen gaitu: ez dago aitzakiarik, beti egin dezakegu zerbait. Eta lehen esan dugunez, gauza ez da heroismotan ibiltzea, eguneroko gauzetan baizik.

“Pausoz pauso aurrerantz Jainkoarekin aurkitzera”

Frankotan geure burutik kanpo bizi gara, geure sustraietatik etenda, dauzkagun gauzetara makurtuak edo geure zereginetan sakabanatuak. Guztiontzat den Jainkoarekin topatzeak, norberak bizitzan bere baitarantz bide egitea eskatzen du.

“Nor egon daiteke zure santutegian? Nor bizi, zure mendi santuan?” Galdetzen dio salmogileak bere buruari; hau da, nola egin aurrerantz Jainkoarekin topo egitera? Zer dago hor gure esku? Aurkikuntza, azken batean, Jainkoaren dohaina da, baina gure esku dago horretarako prestatzea, irispideko lekuan jartzea.

Jainkoa ez da agertzen edozeinen begiradara. Nolanahiko begiradak, edozein bizimoldek ezin du sumatu Jainkoa. Ezinezkoa izango du begirada anonimo batek, adibidez jendetzan galdutako pertsonak, bai eta gauzen zer eta nolarekin, erro-erroko zergatira heldu gabe, konformatzen den axaleko begiradak ere. Ezinezkoa izango du interesaren, erabilgarritasun eta irabaziaren menpean dagoen begiradak, bai eta gainetik begiratzen duen begiradak ere.